



類別

編號 25503

冊數 4

售價 1.60



望雲館
文詩稿



光緒十四年
仲夏月開雕

序

章君采南年十七補博士弟子員時余方應拔萃科同
出史宗伯松軒師門下由是訂交見其制藝詩賦諸作
雍容華貴書法亦應規合矩卜爲玉堂清品年二十四
充道光癸卯科優貢明年甲辰 恩科舉北闈咸豐壬
子 恩科成進士

廷對閱卷官以第十名進 呈

文宗特拔第一由翰林院修撰累遷至國子祭酒入直
上齋屢司文柄其歷官大略如此生平究心理學喜讀
宋五子書星輅所至識拔多知名士訓士先品行而後

序

文藝閩蜀兩粵士風爲之一變正己物正知其學爲有
本矣憶君未第時里中如謝鞠堂工部徐柳泉中翰趙
粹甫廷尉斯時並以名諸生追逐文場而君年最少拔
幟先登且大魁天下故談科名者尤豔稱之余與君爲
文字交然向所見者特風檐應試社會課藝至古文字
今體詩則未之見也洎君宦遊南北會少離多期他日
優游林下重與論文快覩全集豈知視學粵東積勞成
疾以光緒元年五月十日卒於廉州行館吁可惜也邇
者吾嗣閩生明經將以遺稿付梓奉叔父渠卿刺史所
編次者屬爲校勘并以序請余受而讀之愛其瀟灑出

塵如初日芙蓉如臨風玉樹大旨尤在闡發儒先義蘊
晴窗把玩不啻數十年前與我良友晤對於几席閒前
塵如夢撫卷悵然書此以誌人琴之感
光緒十三年季春月同里愚弟陳勸序



序

國子監祭酒廣東學政章公行狀

公諱鏊字配芝號采南系出福建浦城南唐高州刺史
仔鈞其夫人練氏有全蒲城功世所傳全城章氏者也
歷宋元明遷浙江省城再遷新昌之斑竹入

國朝始遷鄞遂世爲鄞人曾祖賢儀登仕郎祖堅父忠
型於國子監生三世皆以公貴

誥贈資政大夫曾祖妣吳祖妣節孝何妣洪皆

誥贈夫人同產三人公居長次鑿監生中書科中書次
鏊同治四年順天舉人內閣中書升用知州公生而穎
異九歲能詩入家塾辨色卽起履蹈規渠有若成人家

行狀

故清寒伯父忠塹節衣縮食教育之公益刻苦勤學雖
令節讀書不少休年十七成諸生累試高等補廩饒道
光十六年以優行貢極爲督學侍郎羅公文俊所激賞
同榜六人公及金公鶴清洪公昌燕相繼以鼎甲入翰
林科名盛事得未曾有十七年考充入旗官學教習其
年秋中式順天舉人三十年教習期滿以知縣用咸豐
二年會試中式貢士

殿試進呈名列第十

文宗顯皇帝臨軒親擢一甲第一名

朝考復以一等第二名

親擢第一授翰林院修撰再承

特簡魁多士朝列榮之五年充四川鄉試正考官九年充會試同考官分教庶吉士奉

旨分寫文選六臣註第五第六兩卷旋充順天鄉試同考官十年三月蕭山相國朱文端公以公品學兼優薦奉

旨上書房行走以京察一等

記名是年秋扈

蹕木蘭時粵逆竄擾江浙公再奉

諭旨以家有老親許南還省護公面承

行狀

恩命感激不覺涕下伏念中外事殷方

塵宵旰職備侍從不敢遂其烏鳥之私因瀝陳依戀請
族

回鑾有日始敢奉

詔由是益被

眷顧嘗和 醇邸指佞草詩有云莫言 盛世無奸佞

元愷相期共效忠匡時之志溢于言表十一年

欽派考差閱卷大臣異數也奉

旨編輯治平寶鑑充 日講起居注官分教庶吉士同

治元年充廣西鄉試正考官差竣乞假歸省二年春還

京旋

命督學福建就遷詹事府右贊善歷翰林院侍讀侍講詹事府右庶子轉左庶子三年七月父憂歸六年起授國子監祭酒直上書房七年八月母艱歸十年起原官仍直上書房歷充文淵閣校理國史館協修纂修總纂翰林院本衙門撰文

實錄館纂修

宣宗成皇帝實錄告成欽奉

頒賜聖訓杖屨

賜福字十二年秋奉

行狀

命提督廣東學政光緒元年四月按試廉州已積勞感瘴力疾校試竣事啟行以五月十日抵白沙卒於行館年五十有六公性孝友尤究心理學躬行實踐既成名贈公常訓以立身敦品莫忘寒素勉修儒術上答

主知公終身恪奉之再奉諱於以服官不及親視含殮毀至骨立既葬猶廬宿墓次晨夕展禮依依如事生初抵廣州聞仲弟之喪慟幾不任奉將使事強抑至情枕函淚漬旬月不乾列掌文衡取士盡一時之選時論翕然生平服膺宋五子於道學源流最所熟諳兼能會朱陸而通其郵鄞先儒袁正獻公以象山高弟得請從祀

文廟公方長國學實主其議視學福建嘗輯閩儒學
則板行之及居母憂主講省垣崇文書院著浙江九先
生傳皆親爲製序凡浙閩從祀兩廡諸儒言行略可攷
見承學之士因之有所服習焉閩之械鬪溺女火葬粵
之抗糧健訟拐帶勒贖皆敝俗有司厲禁所未能絕公
奉使兩省皆與總督巡撫及兩司各道熟籌良法通飭
州縣愷切曉諭力革澆風以爲風俗之端本於教化每
按臨所及必集生童誥諭導俾轉相告誡無或怠翫
嶺南地廣多荒率之區公手諭勸立義學分給小學集
解讀書分年日程諸書以勵之一歲中凡建興十有餘

行狀

四

所退陬僻壤文教殆無勿徧闡姓打標尤爲粵中鉅靈
當事者或爲所啗則縱之勿問公力清其源且手牘移
撫部嚴懲首惡數輩而曲貫餘人開其自新終公任無
敢犯者公旣以儒臣疊荷

先朝知遇駸駸大用中年凋喪時論惜之德祖於公居
鄰郡且及公季弟知州君爲同歲生歲在戊辰就試禮
部用鄉誼謁見公京邸恂恂退讓粹乎學養接引後進
惟恐不及竊以爲難能旣而數從知州君益習公學行
私輒件繫槩素志其仰止於今逾十稔矣公子縣學生
廷瀚句爲編次將上之

國史館敢據所知述其章章大者庶有擇焉公所著闕
儒學則已刻望雲館文稿詩稿各一卷雙橋草堂講義
語錄各一卷兩漢三國蒙求一卷未刻

光緒十一年冬十月大挑二等舉人會稽孫德祖講狀

行狀

五

清故國子監祭酒廣東學政章公墓志銘

光緒建元五月初十日國子監祭酒廣東學政章公卒於官越八年公子廷瀚等將卜葬於某山某原其弟子廬江劉秉璋來撫是邦廷瀚乞銘幽烏乎秉璋不文何足以銘吾師然誼不敢辭公諱鏊字能芝號采南浙江鄞縣人先世固閩產一遷杭再遷紹國初有學化者始由紹之新昌遷甯波遂爲鄞人曾祖賢儀登仕郎祖堅父忠型並國學生皆以公貴贈資政大夫曾祖妣吳祖妣何妣洪皆贈夫人資政公生丈夫子三公其長也次鏊候選中書科中書三鏊同治甲子順天舉人官內

墓志

六

閣中書公幼岐嶷不苟言笑容貌若成人年十七補博士弟子員歲科試輒高等道光癸卯舉優行貢成均學使羅公文俊以國士目之明年入都應朝考旋考取入旗漢教習是年甲辰恩科中式順天舉人咸豐壬子恩科成進士

殿試以第十卷進

文宗顯皇帝親擢一甲第一名海內以爲榮庚申三月蕭山朱相國薦公品學兼優得

旨上書房行走比秋西夷擾京畿

文宗幸木蘭公扈

蹕屢

詔南歸公頓首泣曰

車駕未回臣不忍獨還

上頷之公迭掌文衡初視福建學晝夜校藝無倦容所取皆知名士輿論欽然閩人輕生好械鬪公慎重人命商諸巡撫徐公宗幹禁革之俗賴以變提學廣東一如任閩時廣東多僻地罔知嚮學公勸建義塾十餘所教化遂行闈姓者巨賂也鳩多金博勝負歲進陋規以爲常公峻拒弗納並促巡撫張公兆棟飭所屬捕其魁置之法風迺絕凡督學政二典四川廣西鄉試各一分校

墓志

七

順天鄉試一分校會試一闕試差卷一公篤內行在閩迎養資政公侍奉惟謹尋資政公以事歸逾年捐館舍赴至公匍匐星奔葬如禮居廬不忍去遭母夫人喪亦如之仲弟歿撫其孤如己子見者謂爲難能公恪守程朱之學嘗以自勉勉人官祭酒時浙撫馬公以袁正獻

公從祀 文廟詩

上命國子監會議公 奏稱

旨從之視學閩中集先儒事蹟纂閩儒學則一書鏡版流布爲多士式其他著述有望雲館文稿詩稿各一卷雙橋草堂講義語錄各一卷兩漢三國蒙求一卷均未

梓公以文章受

三朝知由脩撰擢右贊善歷侍讀侍講左右庶子洊升祭酒駸駸乎將大用何天迺奪公之速也悲夫公按試廉州回行至中途而卒詢其地蓋陳白沙故里云公生於嘉慶庚辰四月十一日春秋五十有六夫人張氏國學生諱祥祉公女適室尹氏謝氏子六長立泰先公卒次立清後公卒俱張出三廷瀚邑附生尹出四立沂亦後公卒五立涇六立漢俱謝出女一張出適慈谿咸豐乙卯舉人刑部直隸司郎中馮本棠子煊運同職銜銘

墓志

八

於戲哲人朝野望屬云何騎箕而竟不祿惟公之少敏而能文對策

殿上獨弁其羣惟孝友于公之稟性道繼紫陽公之砥行

內廷儼直終慎且勤洎乎治外

帝嘉乃勳其嘉維何維公校士鑒別人材心鏡如水公使於粵二豎爲殃人曰休養卒勞不遑易簣之日廉州按部公齒五旬公名千古明山峩峩甬江淵淵思公不見銘公之阡

賜進士出身

誥授光祿大夫頭品頂戴兵部侍郎兼都察院右副都
御史浙江巡撫兼管鹽政振勇巴圖魯前翰林院侍講
學士門人劉秉璋頓首拜課

墓志

九

鄞縣志傳

章鋆字舵芝號采南幼穎異未冠補諸生以優貢留試
順天公卿皆器重之咸豐二年成進士

廷試擬第十

文宗閱其卷

特擢第一授翰林院修撰歷官至國子監祭酒嘗典四
川廣西鄉試充會試及順天同考官視學福建廣東鋆
居官清慎好讀儒書在福建集閩中儒先事蹟爲閩儒
學則以給士子廣東每屆試期鄉人各射入選之姓以
角勝負謂之闍姓聚錢巨萬歷政多受其私餽鋆嚴行
禁絕又勸建義學十餘所以廣教化試未周以勤勞卒
年五十六

祭酒章公家傳

吾郡章公之卒也會稽孫教諭德祖狀其行廬江劉巡撫秉璋志其墓今歲戊子公子廷瀚將上公生平於國史館復綴舊聞造余請爲家傳余維家乘

國史以傳信一也爰採公遺行之信而有徵者補志狀之未備而以其無徵者例諸闕文公諱鑿字配芝號采南世爲浙江鄞縣人父忠型生三子公居長年十七補諸生累試高等食旣稟充道光十六年優貢十七年考取八旗官學教習中順天舉人咸豐二年成進士以三甲一名登第授翰林脩撰五年充四川鄉試正考官九年充會試順天鄉試同考官分教庶吉士十年相國朱文端以品學兼優薦公奉旨上書房行走京察列一等是秋扈

蹕木蘭十一年

欽派考差閱卷大臣充日講起居注再分教庶吉士同治元年充廣西鄉試正考官差竣假歸省親二年還京命督學福建就遷詹事府右贊善翰林院侍講特讀詹事府左右庶子三年父憂歸主講崇文書院六年陞國子監祭酒復直上書房七年丁母艱十年起原官直上書房如故先後奉

旨分寫文選六臣注編輯治平寶鑑歷充文淵閣校理
國史館協脩纂脩總纂翰林院本衙門撰文

實錄館纂脩

宣宗成皇帝實錄告成

賜

聖訓並屢拜福字之

賞十二年

授廣東學政光緒元年按廉州試竣卒於白沙行館五
月十日也年五十六公生而穎異九歲能詩塾師以霜
花寒碧瓦命對應聲曰霞錦絢紅樓塾師決其他日必

家傳

二

華貴稍長力學志無旁鶩家距月湖書院里許每屆課
公詣院領題歸途構思躑躅道側市人譁指之弗顧也
抵家而成藝已過半矣嘗遇寒食家人旁公書舍治青
菁飯既畢以佐晚飧公見之間自何來傭媪皆笑其專
壹如此南海羅侍郎文俊視學吾浙見公文大激賞時
貢成均者六人公與金君鶴清洪君昌燕後皆相繼
賜及第一榜具三鼎甲士林傳爲佳話公以文章結
主知服官益矢清矢慎四充試差兩任學政皆絕苞苴
減供膳悉心衡文以失人爲懼廬江未遇時嘗購禮闈
遺卷見公評語銜感刺骨執贄稱門下惟謹其督閩學

舉宋儒楊文靖以來從祀

文廟者十二人編其事實曰閩儒學則以訓庠士主崇文則輯兩浙從祀諸儒言行爲九先生傳與諸生相勗勉長成均會吾鄉請宋儒袁正獻從祀兩廡公以祭酒殿九卿獲與

廷議邀

俞允時論榮之凡公所以嘉惠士林表揚先哲此皆彰彰可紀者而其大者尤在粵東嚴禁閩姓一事粵人强悍嗜利倍於他省遇院省試期輒豫射入選之姓以角勝負歷政多受私餽不問公始至卽峻拒立懲首惡數

家傳

三

輩及親戚入幕者一人內外肅然終公之任無敢犯法其歿也粵撫濰縣張公兆棟入奏稱公勤廉清正爲學臣所罕性純孝初入仕途便思歸養屢以

國恩深重未敢上陳而孺慕之私形諸吟詠讀之皆悱惻動人友愛兩弟終身怡怡無違言始公會祖與里人脩漢壽亭侯廟落成之夕夢神賜以畫幅中繪玉堂牡丹二花語之曰此玉堂富貴圖也比公初生封公室中盆蘭挺醜色芝數莖有異香因以爲字而公之捷禮闈家中尙未知甲第封公復夢人自地中出告之曰汝子狀頭也報至果驗闔郡傳爲異徵吾郡自

國初史侍郎大成以大魁登第二百年來公始繼之侍郎

廷試擬第三

世祖拔置第一公

廷擬第十而

文宗拔置第一先後邀異數若合符契其平生仕履嚴
關節勤校閱復略相類至於皇華徂征白雲在望論者
謂公孝思之篤尤於侍郎無愧色云

光緒十四年孟夏月世愚姪葛祥熊謹撰

望雲館文稿

鄞章 整采南著

胞弟整渠卿編次

會稽孫德祖彥清

校勘

慈谿馮一梅夢香

閩儒學則序

至聖先師孔子師表萬世顏曾思孟四聖配饗

廟廷尙矣外此由周諸先賢迄

國朝諸先儒先後從祀俎豆馨香用昭崇報固皆闡明
聖學傳授道統爲後世學者所當取則也謹案禮部頒
行

望雲館文稿

文廟祀位圖

大成殿十二哲

至聖先師弟子十一人其一爲宋先賢朱子宋元明皆

祀朱子於廡

國朝自

聖祖仁皇帝尊朱子之學起諸千五百歲之後升列哲
位朱子稱微之婺源人而生於尤溪居於崇安建陽彝
於崇安則實閩人也東西廡自周先賢鄭大夫公孫氏
衛大夫蘧氏至

國朝先儒湯文正公陸清獻公共一百四十八人生於

宋以後者止四十五人而閩先儒則由宋中葉逮明季
歷朝崇祀及

國朝增祀者共十有一人又配饗於

崇聖祠者自周以後十人而閩則有宋先儒蔡氏一人
猗歟盛哉閩之大儒輩出洵可謂海濱鄒魯矣夫三代
以上尼山集羣聖之大成而孟子繼其緒三代而下濂
洛紹洙泗之傳而朱子集諸賢之成閩中宋先儒楊羅
諸子爲朱子啟其先而自宋先儒蔡氏父子以逮明先
儒蔡子黃子皆宗朱子之學一脈相傳與於斯文之統
斯固以賦稟之粹早奮志於聖賢而數百年間接武而
起儒術之盛若有獨萃於一方者殆亦以里居相近或
求之親炙或企之私淑尊師取友具有淵源其聞道較
易而所造因之益邃耶余奉

命視學閩嶠思學臣職在敷教而敷教莫先於善俗善
俗莫先於正學術以振儒風因於校閱餘閒錄先賢朱
子及楊子以下諸先儒言行彙爲一編付梓顏之曰閩
儒學則旣以朝夕循誦奉爲法則更望多士讀之懷鄉
邦之賢哲而倍切其高山仰止景行行止之思庶幾端
厥趨嚮無背乎閩儒之學卽無背乎濂洛之學亦卽無
背乎洙泗之學焉則是編或亦勸學之一助也歟

浙江九先生傳序

昔視學閩省嘗刊閩儒學則皮版鰲峯書院蓋溯閩儒之從祀

文廟者始宋儒楊子遠明儒黃子輯其傳爲一編旣以時時玩索奉爲法則而又望生其地者緬鄉邦之前哲聞風興起羣相則倣循循於大中至正之道而勿入歧趨庶於學術人心或有益焉茲奉諱在籍膺大吏之聘主講省會西湖崇文書院因思吾浙儒先耐饗

廟廷者亦代有其人宋儒呂子明儒王子宋明已先後從祀其

國朝增祀者則

世廟詔予從祀爲唐儒陸子明儒劉子

今上詔予從祀爲明儒方子諸先生遭際不同所表見者亦各異而躬行實踐師法聖賢其揆一也千百年來風流尙在海內之士有志於學者皆將讀其書論其世而欣欣然慕倣之况幸生諸先生之鄉世旣未遠居又相近於以等其未墜之緒微言之傳而求夫審端用力之要以策勵身心不更顯明親切也哉爰蒐諸先生之傳匯而輯之以與同志者觀感而奮興焉若夫諸先生之著述富矣儻得盡取其集而徧觀之當更有以廣後

學之見聞而博其旨趣近自浙東西俱經兵燹羣籍散亡而諸先生之書之存焉者蓋寡卽有好古之士懃懃掇拾罕得其全是則可慨者已雖然諸先生之全書固不易得而誦諸先生之傳則諸先生之躬行實踐師法聖賢者要可得其梗概也高山仰止景行行止雖不能至心嚮往之是傳之輯亦猶曩編閩儒學則之志云爾

小學集解序

國家取士之典士子進身之階自學校始特榮之曰正途士也顧名思義宜如何自重哉學使之於多士則猶父兄於其子弟也愛之切教之安得不嚴嘗恭讀

聖祖仁皇帝諭曰從來學者先立品行次及文學子衿佻達自昔所譏苟行止有虧雖讀書何益自茲以往內而國學外而直省鄉校凡學官師長皆有司鐸之責者並宜傳集諸生多方董勸又恭讀

世宗憲皇帝諭曰士乃四民之首凡屬編氓皆尊之奉之以爲讀聖賢書列膠庠之選其所言所行俱可以爲鄉人法則士習不端民風何由而正又恭讀

高宗純皇帝諭曰設科取士期得真才始進不端則爲衣冠中敗類

聖訓煌煌萬世教士者所當敬謹闡揚爲士者所當敬

謹遵守也

皇帝御極之十二年秋恭奉

恩命視學嶺南

召對諭曰文風士習皆須整頓廣東地大汝其慎之又
慎退而恭繹

聖意惴惴懼弗克勝因思文風與士習相表裏士習正
則文風亦易正卽世道人心胥可因之以正而欲正文
風士習殆由於學術之正蓋學術有三曰訓詁之學曰
詞章之學曰儒者之學攻訓詁者牽於註釋而未觀其
大飾詞章者競尙富麗而務以悅人二者之中固不乏

佳士而如謂人人文行皆優則未敢信也若儒者之學
何嘗廢訓詁而不滯於訓詁必以理義爲宗何嘗細詞
章而不溺於詞章必以德性爲急爲此學者洵有志於
向上事業凡平日所讀之書務克切己體認躬行實踐
然後以其所心得者據爲載道之文人品文品有不粹
然一出於正者乎夫儒者之學莫盛於宋莫尊於朱子
而最切要者在小學一書因刷印

國朝張清恪公小學集解於按臨發落時面給優等生
員入學儒童申以勸戒願多士熟讀是書句句字字講
明切究確見得做人樣子中心敬信猛省力行勿專以

舉業爲務或致有文無行判做人與做文截然兩途由斯以徧讀濂洛關閩及諸儒先書而上泝洙泗心源講求大學明新至善之道處爲正士出爲名臣用副

聖天子樂育人材至意此則縷縷寸忱所日望之者爾

中庸脈解序

士號稱讀書人今之士則多不讀書而專讀時文矣摹聲調習對偶其有以此獲雋者遂羣焉傲之師以傳於弟弟以受於師案上所陳坊刻庸濫講章摘本類典外惟墨卷考卷而已求其讀經史性理等書固鮮卽四書正文朱註亦不勤讀試以四書題文論語題或尙明書理若學庸及孟子長章內題則茫然耳聲調對偶雖工而文不切題何足以言文哉夫作文與作人本一理也作人要好非先明聖賢所言之理不可作文要好亦非先明聖賢所言之理不可

國家釐正文體以清真雅正爲宗固謂文能代聖賢立言合乎聖賢所言之理方能學聖賢之爲人士子作文其可不先明書理乎雖然多士僻處鄉隅見聞淺陋其自上而風示之則在學官之職有教士之責者矣昔宋胡安定先生教授蘇湖爲諸生解經至有要義懇懇爲言其治已而復治人者學徒爲文章皆傳經義必以理

勝信其師說敦尙行實蔚然成材元許文正公以集賢
大學士兼國子祭酒請徵弟子王梓等爲齋長說書章
數不務多惟懇欵周折若未甚領解則引證設譬必使
通曉而後已嘗問諸生此章書義若推之自身今日之
事有可用否大凡欲其踐行而不徒說也此其教人固
亦務明書理俾知作人作文皆當以聖賢所言之理爲
標準矣余歲試肇慶文場畢封川司訓英心齋同年以
所著中庸脈解索序其議論之精確詳盡前學使何棣
珊前輩已嘉許之矣余更喜其教士之有方循循焉將
由文而進之於道也不難嶺南自明陳文恭公昌明正
學儒術以端涵濡於我

朝之文教二百餘年士之經明行修有體有用者更不
乏人亦彬彬乎可稱海濱鄒魯矣司訓爲文恭公同里
後學其教學固遠有端緒歟粵東人士儻皆能聞江門
之風而興焉則莫不潛心正學師之所以教弟之所以
學皆恥專讀時文旣講明聖賢所言之理以作文卽講
明聖賢所言之理以作人中庸之所言困知勉行必求
其能之也豈非斯文之盛吾道之幸也哉

讀書十要序

番禺陸磐石先生品端學粹講學穗城者有年力變浮

薄之習前後從遊三千人晚年任高州學官亦稱厥職
其平素教人法著有讀書十要字字切實句句簡明允
足開示來學余試瓊州闔屬歲科畢詰嗣植生教授錄
以見跡且請行之各學用廣流傳欣然許之因屬刊印
成帙詔司鐸諸君子俾示諸生以資警省庶傳先生善
誘之澤成教授錫類之善而余之汲汲於端士習亦可
藉此而獲其益也夫

天經地義錄序

嘗思大學一書首言學學者學爲孝也中庸一書首言
教教者教以孝也人有五倫孝居其先自天子以至於
庶人莫不由之故聖賢立教必先以孝爲開卷第一義
則甚矣孝固百行之原而于聖百王之事業經天緯地
之文章皆由此出也我

聖祖仁皇帝法

祖尊

親孝思不匱

欽定孝經衍義一書衍釋經文義理詳貫與

聖諭廣訓十六條頒諸學宮垂爲永典此我

朝孝治天下之至意俾海澨山陬之民岬然向道而慕
義也

